

Date – 15/03/2024  
Time - 7:30 -7:40Hrs  
REGIONAL NEWS BULLETIN

HEADLINES (MORNING)

1. MBSE-in Matric exam mekah Social Science exam nawn a ni dawn lo a ti.
2. AH & VEty Minister Pu C.Lalsawivunga'n Sa leh Bawngnhnute a intodelh turin theih tawp chhuah a ni dawn a ti.
3. IAS officer pension Gyanesh Kumar leh Sukhbir Singh Sandhu te chu Election Commissioner atan ruat an ni
4. Election Commission chuan State Bank of India atanga a dawn electoral bonds data chu an website-ah a tarchhuak.

<><><>

MBSE

Mizoram Board of School Education (MBSE)-in High School Leaving Certificate Examination kalpui mekah Social Science exam nawn a ni dawn lo a ti a.

Hemi chungchanga MBSE thuchhuahah Social Science chhanna paper endik dan tur chungchangah zirlai tute mahin an tawrh lohna tur leh hamthatna chang bik an awm lohna turin Examination Committeein hma a la ang, a ti a.

He thil duhawm lo tak thleng avanga zirlai te, zirtirtu te leh nu leh pate rilru chiaina leh hlauhthawna lo thleng zawng zawngah School Education Department leh MBSE chuan pawl a ti tak zet a. Zirlaite harsatna hrethiam takin MBSE chuan hma a la dawn a, tumah chiai lo turin leh thlamuang taka awm theuh turin a chah a. Hetiang thil duhawm lo hi a thlen nawn tawh lohna turin hma a la zel dawn a ti bawk.

<><><>

MIZORAM STATE PROJECT MONITORING COMT

Mizoram State Project Monitoring Committee chu an Chairman Pu Lalduhoma, Chief Minister hovin CM Conference Hall-ah nimin khan an thukhawm a, an hnathawh dan tur thil pawimawh hrang hrang te an rel.

Chief Minister chuan, mipui sawrkar din an tum tlat tih sawiin, hmasawna hnathawh mekte chak taka a kal a, hun tiam chhunga hna zawh anih thin theih nan leh hmasawna hmel thar hmuh thuai thuai theih nan he committee hi din a ni a ti a, hei hi Eirukna dona tha lutuk a ni, a ti.

He committee ah hian Party aiawhte, tlawmngaipawl aiawhte, kohhran aiawh thlengin member an ruat a, a tul angin member hi la ruat belh theih a ni, a ti a. An thuneihna pawh a zauva, dik taka hna an thawh phawt chuan state hian nasa takin a hlawkpui dawn a ni, a ti.

Vice Chairman Pu RL Rinawma chuan Project endik theih an khawnkhawm tawh te, endik dan kalhmang tur an duan te, team hrang pathuma an inthendarh dan te sawifiahin Member ten an rawtna hrang hrang pawh an sawi hi a ni.

Project Monitoring Committee te hian Mizorama hmasawna hna thawk mektu contractor zawng zawngte chu tha taka Monitoring Committee hi lo thawhpui turin a sawm a, mipuite pawh an khua leh venga hnathawh mekte tha tawk lova an hriat chuan Project Monitoring Committee hnenah thlen thin turin an ngen a ni.

<><><>

#### AH&VETY MINISTER

Animal Husbandry & Veterinary Minister Pu C.Lalsawivunga'n Thenzawl Vety farm tlawhin, Sa leh Bawngnutea intodelh turin theih tawp chhuah a ni dawn a ti

AH&Vety Department changtu Pu C Lalsawivunga chuan Thenzawla AH&Vety farm tihchangtlun lehzual dan tur ngaihtuahin an hmalak mekna leh hmachhawpte a hmunah nimin khan a en a, Saa intodelhna tura hmanraw pawimawh ber te zinga mi chu ran chaw a intodelh hmasak a ni a ti a, fodder hi a tam thei ang ber siamchhuah tum niin Thenzawl Vety farm ah chak taka hmalak tum a ni, a ti. Mizorama bawng vulhtute harsatna sutkian nan Bana Kaih Policy kaltlangin ran vulhtute hnenah fodder pek chhuah a ni dawn a. Kut hnathawktuten fodder hi an rawn phurh chhuah ngai lovin an bawng vulhna hmun thleng Department motor-in a phurhsak ang a, a fodder man chawi loin a phurhna atana petrol/diesel man chauh kut hnathawktute hian an chawi ang a ti.

Thenzawl farm-ah hian ran chaw fodder plantation neih mek zau zawng hi 15 hectare vel a ni a, hmarchhak state te zingah sawrkar hmalaknaa fodder plantation nei zau ber state a ni. Kumin atang hian nasa lehzuala hmalak tum niin tin 40 hmun vela zauah fodder plantation neih belh tum a ni a. Heng atanga ran chaw siam chhuah te hi Mizoram hmun hrang hranga bawng vulhna hmunah te sem chhuah a ni dawn a ni.

Thenzawl Vety farm ah hian se chi tha tihpunna tur buatsaih tum niin tender chhuah mek a ni a. Tunah hian pui ruk leh a pa pakhat dah mek a ni. Kel tihpun tumin nasa takin hmalak a ni bawk a. Rajasthan atangin kel chi lian chi sirohi leh beetal lakluh a ni a. Kel chi tha, kum khatah no vawihnih tal nei thei tur leh a pumraw lian tha siam chhuah tumin phai atanga kel lian chi an lak luh te leh Mizo kel vulh thin pangai te inthlahpawlh tir an ni a. Crossbreed hi a tahtawl a tih chhunzawm zel tur niin an that tawk leh tawk loh zir chiang a, enchhinna neih chhunzawm zel a ni dawn tih Department hotuten an sawi a ni.

Zo Vawk a ral loh nan Vety Department hian Thenzawl farm-ah engemaw zat an vulh mek bawk a. Zo vawk hi Mizo pi pu ten an lo vulh thin, Mizoram mil a nih avang leh vulh a hautak loh vang te, a sa a tui bik avang tein mipui nawlpuiin an vulh uar lehzuale theih nan Department chuan tan a la a ni.

<><><>

## LAWNGTLAI LEGAL AWARENESS

Lawngtlai District Legal Service Authority leh MJA Lawngtlai District te tangkawp buatsaihin CJM office chamber ah nimin khan MJA Lawngtlai District member te pualin Legal Awareness Programme hman a ni.

Pu C.Lalrinfela Advocate chuan he hun hi a kaihruaia, Judicial Magistrate First Class Pu C.Lalremsanga leh Pu ST Ramhmachhuanmawia Advocate ten Journalist te tan a hriattur pawimawh hrang hrangte an sawi a, Journalist ten hriatduh an neih, dan leh a kaihhnawihlam te zawtin huamzautaka sawihona hun hman a ni.

District MJA President Pu Elvis Lalthangzuala chuan Journalist te inzirreng ngai an nih thute, Media thangzelah midang kaihruaitu an nih vangin an hna leh a kaihhnawihah dan hriat chu an tan a pawimawh vanga hetiang hun hi hman a nih thu a sawi.

MJA Lawngtlai District Member te puala Legal Awareness Programme buatsaih ah hian Chanchinthar thehdarhna ah dan bawhchhiatna langsar leh thleng fo thinte sawilan niin, dan bawhchhiat hlau taka Journalist te an kallai in tunlai hun ah Youtube leh Social Media dangah thungam tak tak an awm thin chu ngaimawhawm an tih thu sawilan a ni a, hetiang lama Lawngtlai District dinhmunte sawiho niin, thubuai ngaihtuahlai ah phei chuan mimal ngaihdan leh kawng diklova midang hruaikawi thei thehdarh ang chi ah te fimkhur a ngaihthute, thil engemaw a thlenin, thu ngam lutukte a fuhberloh thu leh thubuai neih mai awlsam tak a nihdan te sawilan a ni.

<><><>

## KHAWZAWL

Zu leh Ruihhlo phur leh phur lo motor endik runpui Khawzawl District Narco Coordination Center (NCORD) hmalakna in neih a ni a, National Highway-06, Aizawl leh Champhai Road-a Lungvar Junction Khawzawl ah lirtheite hi endik a ni.

Nimin khan Khawzawl District Narco Coordination Center (NCORD) hmalaknain helaia Motor tlan tlang ten dan phal loh - zu leh ruihhlo te an phur leh phurh loh enfiah a ni. Motor endik runpui hi Ruihhlo Do Beihpui 'Special Drive Against Drugs' bultanna a ni a.

He hunah hian Khawzawl SP Pu Lalchhuanthanga hovin motor endik a ni a. Khawzawl Traffic Police te chuan he hun ah hian, motora chetsualna a lo tlem theih nan inzirtirna lehkha (pamphlet) an semchhuak bawk.

<><><>

## NHM REVIEWMEETING

Ni 2 chung awh tur National Health Mission State Level Review Meeting chu nimin atang khan Directorate of Hospital & Medical Education Auditorium, MINECO ah neih a ni a. Health & Family Welfare minister Pi Lalrinpuiin hmanpuiin, Pi Esther Lalruatkimi, Principal Secretary, H&FW Department chuan Review Meeting hi a kaihruai a ni.

Review Meeting-ah hian National Health Mission hnuai hmalakna hrang hrangte Mission Director Dr. Eric Zomawia chuan a sawi a, Mipuite hriselna atana thahnemngai taka thawktu NHM staff zawng zawng te hnenah lawmthu a sawi. Mission Director chuan NHM hmachhawp hrang hrang te leh hmasawna tur hrang

hrang te a sawi bawk. NHM Mizoram hnuai RCH Programme chuan teh fung hrang hrangah North East State zinga ti tha ber niin lawmman pakhatna “7th JRD Tata Memorial Award” a dawng a ni.

Pi Lalrinpuii chuan thawktu indaih lohna nasa tak su kiang tur in theihtawp an chhuah dawn tih a sawi a, Tele-medicine ti changlung turin Programme officer te a ngen a, Health Programme tam tak an kalpui ah te theihtawp an chhuah thin lain damlo enkawl nen kaihkawp thiam a tul hle a ti a. Health Dept a thawktute an chhuanawm em em a, chutih rualin mipui tana thawk an ni tih hria a, thawhhona tha nei turin a chah a ni. Hun vawn dik kawngah hmasawn zel tura chah bawkin, Programme Officer te leh Staff zawng zawng te chu mahni programme theuh-a thahnemngai taka thawk turin leh Health Department tana theihtawp chhuah zel turin a chah bawk.

Health Minister Special Award siam niin NHM Mizoram hnuai hmun kilkhawra rinawm leh tha taka thawktu mi 9 hnenah he award hi Pi Lalrinpuii'n a hlan a ni.

Ni 2 chhung awh tur Review Meeting ah hian NHM hnuai Programme National Health Programme hrang hrang 37 hnuai hmasawna te a chang tu Officer te kaihhruaina hnuai thlirho a ni a, hmasawn zawk leh tha zawk a kal dan tur sawiho a ni bawk.

<><><>

## MIZORAM STATE POLICY

Chief Minister Pu Lalduhoma chuan Mizoram State Policy Coordination Committee te hnathawh ber tur chu sorkar policy Hand Holding Policy enkawl a ni a ti.

He thu hi nimina CM Meeting Room Mizoram State Policy Coordination Committee thutkhawm, Chairman a nih anga a kaihhruainaah Chief Minister hian a sawi a. Chief Minister chuan Mizoram State Policy Coordination Committee in concern department te hmalakna a tul anga an enpui tur thu te, thurawn pek te leh hmalakna kal kawppui theih chi te bakah central lama sum hnar zawn belh thlenga an thawh dawn thu a sawi a. Mithiam ber ber thlan khawm an ni tih member te chu hrihlin hnathawh dan awlsam leh rang, rintlak si hmanga sawrkar policy pui ber kalpui tuma theihtawp chhuah turin a fuih a ni.

He hunah hian Mizoram State Policy Coordination Committee Vice Chairman Dr. KC Malsawmzauva, Adviser to CM ni bawk chuan hmalak dan tur an chhawp chhuah tlangpuite a sawifiah a. Hemi zawhah hian thil pawimawh hrang hrangte relin concern department tur te an thlang fel a, a rang lama thutkhawm pui ni se tiin an rel bawk a ni.

Mizoram sawrkar hian Hand Holding Policy atan sawrkar kumthar budget ah cheng vbc 200 a dah a, kumin hi Year of Consolidation a nih avangin Pilot Project angin kalpui phawt tur a ni tih thutkhawmah hian tarlan a ni.

<><><>

## NEW ELECTION COMMISSIONER

IAS officer pension Gyanesh Kumar leh Sukhbir Singh Sandhu te chu Election Commissioner atan ruat an ni. Hemi chungchangah hian Ministry of Law and Justice chuan hriattirna a tichhuak a. Election Commissioner pahnihte hi Anup Chandra Pandey-a pension hnu leh Arun Goel te ban hnuah ruat an ni.

<><><>

#### ELECTION COMMISSION

Election Commission chuan nimin khan State Bank of India atanga a dawn angin electoral bonds data chu an website-ah a upload a ni. SBI hian Electoral bonds chungchanga data hi Supreme Court thupek zawmin tun thla ni 12 khan Election Commission hnenah a lo pe tawh a ni. Data hi [www.eci.gov.in/candidate-politicalparty](http://www.eci.gov.in/candidate-politicalparty) ah en theih a ni.

Poll panel chuan thuchhuah siamin, Election Commission chuan langtlang taka kalpui a duh thu a sawi chhuak a ni

<><><>